



Chlaussprüche 2011

Gaby Grünenfelder

Wenn iär in dr Rächäschür spielen isch allnä klar,
wär im Dezember isch eurä Geburtstags Jubilar.
Am Locher Fredi spielen iär vorem Buurähof,
dass mä sich warm aleit weiss schu jedä Gof!
Nu euri Chindergärtneri Gaby chunt mitemä lichtä Jäggli,
Und frührt nid nu saumässig an ihri Händ und Bäggli.
Gschlotteret hät sie wienä nasses Chalb döt ussä,
sie hät nid grächnet, dass iär spielen verussä.
Gaby, merk diär folgendes:
Üserä Chef, also dr Jesus seit zu dä Korinter,
langi Unterschlüch git warm im Winter!

Sandro Koch

D Hosä am Arsch undä isch bi dä Jungä voll im Trend,
bim bückä rutschens abä, dass alli d Unterschlüch gsend.
Dass d Hosä nid abärutschen müäns breit laufä,
ä Variantä wär do zum Bispiel än Gurt ischlaufä!?

Simon Teuscher

apropos Hosä....
Vum Uniform aprobierä hätmä ghört so luschtigi Gschichtä,
do drüber möchti eu au gad no öpis brichtä.
Wo diä Jungä d Uniform hen müässä aprobierä,
hen ä paar gmotzt und wellä reklamierä.
Simon: „Diä Hosä simmer z eng, diä passen nid!“
Bütiker: „diä muäsch ebä ufäzuchä bis zum Schritt!“
Dr Simon denkt sich: hät denn dä eis am Sender?
Denn hani jo dr ganz Zit än ...rotä Chopf (Ständer)!



MUSIKGESELLSCHAFT SARGANS

JAHRESKONZERT

Öb Kurs, Chrank, än dickä Dumä oder d Achillessehnä grissä, so churz vorem Konzert isch das halt schu ä chli verschissä.

Wenn z Schlagzug fehlt merkt mä das sofort bim probä, dr Sascha cha eu drum au nid würgli lobä.

A dä Hauptprob häts aber stark besseret und alli hin sich zimägnoh. D Stückli hin gfägt und dä Rhythmus hät an zackigä Groov übercho!

Zimä mitä Jagdhorngруппä hin iär z Konzert zum Beschtä geh, än riesä Applaus und viel Lob hin iär drfür dörfä entgägä neh.

BRAVO MUSIG! Nu witer äso!

Ufrumä

Imelda Haltinner, Ernst Wortmann

Ufem Klavier, stön X Fläschä Bier....

Nochem Ufrumä sind ä paar Herrä im Halbkreis gsässä, wos Fleischvögel oder Buuräwurst geh hät zum ässä.

D Imelda hät sich z mittst vorä Halbkreis gsetzt, und mit denä Manä weiss ich was gschwätzt.

Usgsiä häts wiä „liebe Martha“ oder sus ä Selbsthilfegruppä, was hins ächt wieder usglöfflet was fürä heissi Suppä?

I: Muäss alläwil dä plogeti Ernstli si,
solang dassi läbä so lang dassi bi...!

Ja Ernst, äs trifft ebä immer diä glichä zum plogä, nochem Ufrumä isch dr Stefan sonä fiesä Chogä.

Öb mit Putzutensiliä, fötälä oder Hoor abschnidä, dr Ernst chunnt immer dra und är tuät niä mit eu chibä!



MUSIKGESELLSCHAFT SARGANS

Fasnacht

Regionalä Sperrguättag hät euers Motto gheissä,
alli hin ä hufä Grümpel dörfä zimäreisä.
Polstergruppä, Lampäschirm oder ä Torwand vum tschüttä,
alles chamä bringä womä nümä brucht oder wett vertschüttä.
Am Umzug isch eurä Wagä schu vu witem z gseh,
än riesä Sperrmüllhufä und hindädri chunt no viel meh!
Mit Ichaufswägeli, Ahänger oder Carettä bringender dä Plunder,
au ä fahrends Glettibrätt und sogar Sondermüll häts drunder!
D Gmeindsarbeiter wenn diä Wahr no ä biz sortierä,
bi dem Ufmarsch isch das aber nümä zum kontrollierä!

Vorbereitungskonzert

Michi Nagy

In Vilters hen iär d Stückli vum Eidgenössischä vortreit,
ä Vobereitungskonzert zum zeigä, iär sind bereit.
Au dr Fähnerich Michi dörf a dem Obet nid fehlä,
im Abschluss tuätmä nämli d Jubilarä no ehrä.
Dr Hansruedi isch mit 25 Johr eurä Jubilar,
dasses än Izug git mit Musig und Fahnä isch ganz klar.
In Reih und Glied tüän iär zur Bühni fürä marschierä,
aber gäll Michi, nögschtmol söttsch denn diä wissä Händschä
montierä!



MUSIKGESELLSCHAFT SARGANS

Eidg. Musikfest St. Gallen

Im Mai und Juni hen iär einigi Isätz mitä Musig ka,
nebst dä vielä Ständli hen iär au ä hufä Probä müässä ha.
Fürs Eidgenössisch wettmä jo guät vorbereitet si,
denn lit am Endi au ä guäts Resultat dri.

Vu dä Böllni hen iär d Röhrägloggä müässä überägutschierä,
damit d Judith das Instrument hät chünä usprobierä.

Sofort häsch du di drmit vertraut gmacht und no glächlet,
dasses aber in St.Gallä ä anders System isch, do drmit häsch du
nid grächnet!?

„Was isch denn dr Unterschied gsi bi denä Röhrägloggä?“

Mitem Resultat sind iär zwor nid vornä mit drbi,
trotzdem isch St. Gallä ä tolls und schüs Erlebnis gsi!
Ä Fäschtmeilä häts ka mit verschiedenstä Ständ,
zum Musig losä, ässä und trinkä was iär gärä wänd.
Gmüätli isches gsi und trunkä hen iär au nid z knapp,
noch dä zwölfä isch dr eint oder ander schu ziemlich schlapp!
Ufem Wäg zur Unterkunft hät dr Wysi jenschi Hürdä gno,
kunststück ischem dä Wäg döt anä sonä längi vorcho!
Äs hät dir trümlert und di gröber gschwaiet,
plötzli hät sich dr Bodä und Decki draiet.

Grind vorab bisch du in Täschä trolet,
dr Manfi hett dir am liebschtä dr Arsch versolet!?
Dr Manfi froggt: „Wieso bisch du ä denä Wäg in Täschä keit?“
Dr Wysi seit: „Jo weisch, z Glichwicht hät ebä gad verseit!“

Inerä Turnhallä hin iär gschlofä alli mitänand,
uferä Luftmatratzä, Mannä und Frauä duränand.
I dem Rum hen fascht alli ihri Regischer zogä und gsaget,
wo diä letschtä itroffä sind häts dussä bereits schu taget.



MUSIKGESELLSCHAFT SARGANS

Quartierständli

Sämi John

Im Früälig hen iär ä hufä Probä und Isätz ka,
nochem Eidgenössischä hetten iär ä verdiänti Pausä dörfä ha.
Trotzdem isch vor dä Feri no ä Quartierständli agseit,
einigi hen sich aber entschuldigt oder sus abseit.

Gstunet hin ä paar, wo dr Sämi mitem Auto verbi gfahrä isch,
duä häsch du d Autoprüfig ka no ganz frisch!

Dass denn mitä Kollegä go usfahrä gosch isch jo rächt und guät,
mehrmols bi dä Musigkameradä verbi fahrä brucht aber doch ä
chli Muät!?

Damit du dinerä Mamä än Ärgerli chasch erspahrä,
würü nögschtmol gschider nämwo anderscht duri fahrä!

Städtlifäscht

D Wuchä vorem Städtlifäscht würd ä hufä gschafft,
äs brucht einiges an Werkzüg, Material und jedi Mengi Chraft.
Am Fritig, 26. Auguscht isch dr Start zum 19. Städtlifäscht gsi,
a dem Tag häts än Föhnsturm geh, wiäs nid het dörfä si.
Im Zelt isches unheimlich wordä, äs hät klepft und grüsig tuä,
d Lüt sin freiwillig usä und z Zelt hender müässä zuä tuä.
Au anderi hen ihri Ussäbautä müässä schlüssä,
bevor dä Sturm no alles fort nünt oder tuät verrissä.

Am Samstig hen alli gspannt ufs Bürostuälrennä gwartet,
dr Stefi wär am liebschtä im Kafimaschinä-Chäfig gstartet.
Das Gfährt isch aber nid Renntauglich gsi,
so stoht där Aff halt bim Andi sim Vehikel hindä dri.
Dr Städtlistutz durab grollt sins ufemä umbautä Traktor,



MUSIKGESELLSCHAFT SARGANS

Getränk hins verchauft, das isch tatsäch wohr!
Vornä druf hät dr Andi no Würscht grilliert,
mit derä Pausä-Nummerä hen iär voll brilliert!
Ä super Idee isch das gsi uf dem kurligä Äbi,
sicher besser als i dem engä Kafimaschinä-Chäfig!
Sit dr Bauhauseröffnig isch dr Steffi stolzä Bsitzer vunerä Garettä,
vilicht flitzt är nöschtmol mit derä durab, „waah, i värreggä“!

Us Sicherheitsgründ sind am Städtlifäscht d Samariter isatzbereit,
fürä Fall, wenn sich öper weh macht oder blöd umkeit.
Ä paar häts geh mit Schnittverletzigä oder Wäspistich,
viel gits nid z tuä, aber umä si müäns halt glich.
D Frog isch, öb mä diä nid söll än Tag länger buächä?
Bim Abbrechä gits hüfig Verletzigä mit chrampfä und ruächä.
Bim Nörbi hetten zwor au d Samariter nütme gnützt,
mit dem isch dr Armin sofort zum Arzt und hätnä gstützt.
Är isch voll inä Lattä inä gloffä,
äs hätnä prezis am Aug zuä troffä!
Ä Wuchä Arbeitsunfähig ischer gsi, där arm Cheib,
noch all dem Isatz woner ka hät, das tuät eim richtig leid!

D Martina isch di ganzi Zit present gsi,
sie hät zum Bispiel d Stross gwünscht oder Uskunft gi.
Am Sunntig hät sie so pinkigi Hosä a ka,
dr Nesi denkt: „so heissi Hosä willi au ämol ha!“
Am Obet sind no ä paar zimä gsässä,
zum Bierli trinkä und Räschtä ufässä.
Spöter am ölfi warens nur noch vier,
jetz gohts zur Sach bim letschtä Bier!
Dr Nesi hät tatsächli no dr Martina ihri Hosä agleit,
„diä passen dir jo fascht“, hät sie nu lachend gseit!
Dr Nesi hät sich in diä Hosä zwängt und cha sogar no sitzä,
drum hät dr Andi als Bewiss das Föteli gad müässä knipsä!



MUSIKGESELLSCHAFT SARGANS

Proben

Nid nu dr Alex gsiät dr Sascha nid so guät,
wenner dirigiert und eu d Isätz geh tuät.
Dr Sascha isch zwor nid sonä chlini Persu,
als Dirigint söller aber ufs Podeschtli ufi stu!
So häter d Übersicht uf di ganzi Truppä,
alli gsiän zu ihm und keinä brucht ä Lupä!

Delegiertenversammlung

Manfi

Dr Manfi isch an dr Delegiertäversammlig geehrt wordä,
a dem Tag häsch du weder Pflichtä no irgend welchi Sorgä.
Ä paar Musigkollegä tüän dich zu derä Fiir begleitä,
do loht mä sich gärä zumenä Bierli verleitä.
Schü hinders ka, häsches richtig chünä gnüssä,
35 Jahr aktiv bi dr Musig, das dörfmä gmüätli begüssä!
Ä hübsches Namensschildli hens dir ans Hemd agsteckt,
bim gnauä Betrachtä hätmä no än chlinä Fehler entdeckt.
Als eidg. Veteranin bisch du agschribä gsi,
zum Glück häts niämert gmerkt, oder ersch hindä dri!

Quizfrage: Wiä heisst diä wiblich Form vu Fähnerich?

Fahnösin!? (richtige Lösung: Fähnerichin!)